

А Ж Р И М

(Ярашганлик муносабати билан жиноят ишлари тугатиш тўғрисида)

2023 йил июнь ойининг 9 куни, жиноят ишлари бўйича Поп туман суди Поп тумани “Исковут” МФЙ биносида, очиқ сайёр суд мажлисида, туман судининг судьяси А.Кенжабаевнинг раислигида, судья ёрдамчиси Х.Бектемировнинг котиблигида, тарафлардан давлат айбловчиси Поп туман прокурорининг катта ёрдамчиси Г.Шарипова, судланувчи Ж.Халилов, жабрланувчи Р.Ортиқовнинг иштирокида, Халилов Жахонгир Жўрабаевичга оид 1-1606-2302/161-сонли жиноят иши кўриб чиқилди.

Халилов Жахонгир Жўрабаевич, 1989 йил

11 сентябрда Чуст туманида туғилган, ўзбек, Ўзбекистон фуқароси, маълумоти ўрта, мавсумий ишчи, уйланмаган, судланмаган, Чуст тумани, “Мустақиллик” МФЙ, Мустақиллик кўчаси, 114-уйда яшайди, муносиб хулқ-атворда бўлиш ҳақидаги тилхат эҳтиёт чораси қўлланилган, айблов далолатномаси нусхасини 2023 йил 31 майда олган.

Ўзбекистон Республикаси ЖК 266-моддасининг 1-қисми билан айбланган.

Суд, суд мажлисида судланувчи ва жабрланувчининг судга тақдим этган ўзаро ярашув ҳақидаги аризаларини кўриб чиқиб, уларнинг кўрсатувларини ҳамда тарафларнинг фикрини тинглаб, жиноят иши ҳужжатларини ўрганиб чиқиб, ишда мавжуд бўлган далилларга баҳо бериб, қуйидагиларни

А Н И Қ Л А Д И:

Дастлабки тергов органи томонидан судланувчи Ж.Халилов

2023 йил 28 апрель куни “Нексия-2” русумли, 50J771AA давлат рақамли автомашинасини “Пунгон-Поп” автомобиль йўлининг 34 км.да бошқариб кетаётиб, “Йўл ҳаракати қоидалари”нинг 4-бандидаги Йўл ҳаракати қатнашчилари бошқа йўл ҳаракати қатнашчиларининг ҳаракатланишига хавф туғдирмасликлари, ҳаракатга тўсқинлик туғдирган шахс уни тезда бартараф қилиш учун имконияти даражасида барча чораларни кўриши кераклиги, 77-бандидаги ҳайдовчи ҳаракатнинг серқатновлигини, транспорт воситаси ва юкнинг хусусияти ҳамда ҳолатини, йўл ва об-ҳаво шароитини, шунингдек, ҳаракатланиш йўналишидаги кўринишни ҳисобга олган ҳолда транспорт воситасини белгиланган чекланган тезликдан



оширмасдан бошқариши кераклиги, ҳаракатланишда ҳайдовчи аниқлай олиши имкониятида бўлган хавф ёки тўсиқ, пайдо бўлса, у транспорт воситасининг тезлигини тўла тўхтатишни таъминлайдиган даражада камайтириши ёки тўсиқни бошқа ҳаракат қатнашчилари учун хавфсиз айланиб ўтиш чораларини кўриши кераклиги ҳақидаги талабларни қўпол равишда бузиб, ҳаракат хавфсизлигини таъминлай олмасдан, бошқарувни йўқотиб, йўлнинг чап томонидан ўнг томонига кесиб ўтаётган пиёда Р.Ортиқовни уриб юбориши натижасида Р.Ортиқовга ҳаёт учун хавфли бўлган оғир шикаст етказганликда айбланган.

РСТЭИАМ Наманган филиали Поп туман бўлинмасининг 2 майдаги 634/611-сонли экспертиза хулосасида, Р.Ортиқовнинг тан жароҳатлари – чап билак суякларини типик жойидан ўнг тирсак суягини юқори қисмидан синиб силжиши, кўкрак қафаси ёпиқ шикасти, чапдан 6,7,8 ва ўнгдан 7-8 қовурғаларни чап сон суяги бўйнидан синиши, пешона соҳасида шилинма кўринишида бўлиб, ҳаёт учун хавфли бўлган оғир шикастлар тоифасига кириши кўрсатилган.

Судланувчи Ж.Халилов суд мажлисида, судга ярашув тўғрисида ариза билан мурожаат қилиб, айбига тўлиқ иқрорлиги, қилмишидан чин кўнгиладан пушаймонлиги, содир этган қилмишининг оқибатларини англаб етгани, жабрланувчига етказилган зарарни тўлиқ қоплагани, ҳозирда у билан бирон-бир тазйиқсиз ярашиб олгани, ўртадаги ярашувга рози эканини билдириб, уни жиноий жавобгарликдан озод қилиб, жиноят ишини ярашув асосида тугатишни сўради.

Жабрланувчи Р.Ортиқов судга ярашув тўғрисида ариза билан мурожаат қилиб, Ж.Халилов томонидан содир этилган йўл-транспорт ҳодисаси натижасида тан жароҳати олгани, ҳозирда даволаниши учун кетган харажатлар судланувчи томонидан қоплангани, судланувчига нисбатан ҳеч қандай даъвоси йўқлиги, ярашув тўғрисидаги аризани ўз хоҳиши билан ёзгани, унга бирон-бир тазйиқ бўлмагани, ярашув суд томонидан тасдиқлангандан кейин, келиб чиқадиган ҳуқуқий оқибатларни тушунганлигини билдириб, Ж.Халиловга оид жиноят ишини ярашув асосида тугатишни сўради.

Ўзбекистон Республикаси ЖКнинг 66¹-моддасига мувофиқ, ЖК 266-моддасининг 1-қисмида назарда тутилган жиноятни содир этган шахс, агар у ўз айбига иқрор бўлса, жабрланувчи билан ярашса ва етказилган зарарни бартараф этса, ярашилганлиги муносабати билан жиноий жавобгарликдан озод этилиши мумкин.

Суд, жабрланувчи Р.Ортиқов ва судланувчи Ж.Халиловнинг ярашув тўғрисидаги аризаларини жиноят иши ҳужжатлари билан ўрганиб, прокурор фикрини эшитиб,



судланувчи Ж.Халиловнинг айбига тўлиқ иқрорлиги, қилмишидан чин кўнгилдан пушаймонлиги, жабрланувчига етказилган зарар тўлиқ қоплангани, уни судланувчига нисбатан даъвоси йўқлиги, жабрланувчига ҳамда судланувчига бирон-бир тазйиқ бўлмагани, судда ўзаро ярашув ҳақида ўз ихтиёрлари билан ариза ёзиб берганликлари ҳамда Ўзбекистон Республикаси ЖК 266-моддасининг

1-қисмида назарда тутилган жиноят ЖКнинг 66¹-моддасига мувофиқ ярашувга тушишини инобатга олиб, жабрланувчи Р.Ортиқовга Ўзбекистон Республикаси ЖПКнинг 583-моддаси 5-қисмига асосан ярашув суд томонидан тасдиқланса, мазкур иш бўйича иш юритишни қайта тиклаш тўғрисида илтимоснома бериш ҳуқуқини йўқотишини тушунтириб, Ж.Халиловга нисбатан юритилган жиноят ишини ярашганлик муносабати билан тугатишни лозим топди.

Шунингдек, суд Ж.Халиловга нисбатан қўлланилган эҳтиёт чорасини бекор қилишни, жиноят ишига илова қилинган Ж.Халиловга тегишли ҳайдовчилик гувоҳномасини Ж.Халиловга тилхат орқали қайтаришни лозим деб топади.

Ўзбекистон Республикаси ЖКнинг 66¹-моддаси, ЖПК 84-моддасининг 4-қисми ва 585-586-моддаларига амал қилиб, суд

А Ж Р И М Қ И Л А Д И:

Халилов Жахонгир Жўрабаевичга нисбатан Ўзбекистон Республикаси ЖК 266-моддасининг 1-қисми билан юритилган жиноят иши у жабрланувчи билан ярашганлиги муносабати билан тугатилсин.

Халилов Жахонгир Жўрабаевичга нисбатан қўлланилган муносиб хулқ-атворда бўлиш ҳақидаги тилхат эҳтиёт чораси ажрим қонуний кучга киргандан сўнг бекор қилинсин.

Етказилган зарарлар тўлиқ қоплангани инобатга олинсин.

Жиноят ишига қўшилган бир дона “DVD” диск жиноят иши билан бирга сақлансин, Ж.Халиловга тегишли ҳайдовчилик гувоҳномаси Ж.Халиловга қайтарилсин.

Ажримдан норози тарафлар йигирма кун ичида шу суд орқали жиноят ишлари бўйича Наманган вилоят судига апелляция тартибида хусусий шикоят ёки протест билдириши мумкин.

Раислик қилувчи (имзо)
А.Кенжабаев

“Аслига тўғри”

Туман судининг судьяси
А.Кенжабаев



Маъсул судья: Кенжабаев Акмал Ахматжанович



Хужжат имзоланган: Кенжабаев Акмал Ахматжанович, 09.06.2023

